

**Protocol no. 78**  
**Sezzüda da gövgia, als 10 october 2013 20.00 – 22.30**

**Preschaints:** Albert Mayer, Andri Poo, Men Caviezel, Dumeng Jann,  
e Marco Fallet (protocol)

S-chüsada Marianne Werro-Lehmann, caus'absenza our  
d'cumün.

**Protocol**

Il protocol no. 77 da la sezzüda da marcurdi, als 2 october 2013 vain approvà.

**695 021 FABRICA**  
**Fabricats da sequondas abitaziuns**

Il schef da fabrica, Dumeng Jann, infuormescha supra la charta previssa da trametter a tuots quels chi han survgni ün permiss da fabrica e chi nun han amo cumanzà cul fabricat. Ultra da quai survegnan quella charta eir ils architects. Ils cumüns ston decider resp. definir üna data da scadenza a regard il conceder permiss da prolungaziun per quels fabricats. La cumischun da fabrica s'ha occupada da la probematica e propuon'al cussagl ün term maximal dad ün on e 45 dis a partir da la data dal decret da fabrica. Davopro scad'il permiss in möd definitiv. Pro cumanzamaints da fabrica «d'alibi» as reserv'il cumün il dret da relaschar disposiziuns da sbodada.

**696 810.501.16 Don strasora Uina**  
**Rumida da boudas / strasoras Chant da la Grava**

Men Caviezel, cusglier dal dicasteri, infuormescha supra las lavuors da rumida e supr'ils cuosts in fatschenda pellas lavuors effectuadas da las dittas Lazzarini SA e Koch SA. Il Cussagl conceda, cun vusch unanima, il credit bsögnaivel da fr. 30'000.00.

**697 300.365 Contribuziuns e donaziuns**  
**Proget da chant pel concert 2014 / dumonda da sustegn**

Eir dal 2014 ais previs da realisar ün proget da chant cun ün cor ad hoc cun partecipaziun da la 5 e 6avla classa da nos cumün. Il magister e manader da quel proget, Andri Gritti, suottametta al cussagl cumünal la dumonda per ün sustegn finanziel, causa cha'ls cuosts surpassan per bainquant las entradas. Il cussagl stima zuond il grond ingaschamaint cultural da numerus abitants da nos cumün e decida da sustgnair quell'ouvra pel on 2014 cun üna contribuziun da fr. 1'000.00.

**Proget da sauaziun Sent**

Il cusglier dal dicasteri, Men Caviezel, ha pretais il protocol da collaudaziun dals 16 november 2012, dal qual il cussagl piglia cugnuschentscha. Da quel nu resultan ingüns manguels vi da l'ouvra resp. muossavias sülla problematica. Il cussagl ais da l'avis, cha'l problem ha da gnir scholt trond in consideraziun las respunsabilitats e las incumbenzas da la planisaziun e dals furniturs. El decida da pretender in scrit davart dal büro respunsabel pella guida da fabrica, Kindschi, cha quel organisesch'üna sezzüda, a la quala tuottas parts tangadas fan part.

**Ditta Axpo / stüdi a regard utilisaziun da l'aua da Val Branca**

Il vicecapo, Andri Poo, orientescha, cha'l büro d'indschegner incumbenzà Caprez (Marco Müller) preschantarà quel stüdi in lündeschdi, als 11 november 2013 da las 10.00 – 12.00 a Ramosch. L'invid in fatschenda seguirà a temp ütil.

**Corporaziun dals cumüns concessiunaris da las OEE**

Davart dal president, Not Carl, ais gnü surdat als cumüns ils sböz pels novs statüts culla missivia e plüssas remarchas specificas supra singuls artichels. La posiziun davart dals cumüns vain giavüschada fin als 31 october 2013. Il vicecapo e cusglier dal dicasteri, Andri Poo, surpiglia da consultar la documainta e da preschantar lura al cussagl üna proposta pella posiziun da nos cumün.

**Posta / dischlocaziun da las chaschellas postalas**

La Posta infuormescha, cha sülla mità da november 2013 figüra l'infuormaziun da giasts sco partenaria da l'agentura da Sent e cha süls 30 da november gnian dischlocadas las chaschellas postalas. Cun quai va il cussagl d'accord.

**Infuormaziun supra la refuorma da l'egualisaziun da finanzas**

In marcurdi, als 30 october 2013 (14.00h) ha lö üna dieta d'infuormaziun davart dal departamaint per finanzas e cumüns supra la refuorma da l'egualisaziun da finanzas. Nos cumün farà eir part cul capo, cul contabel e cul chanzlist.

**Cità d'energia**

Il cusglier dal dicasteri, Men Caviezel, infuormescha supra la dieta, a la quala el e Jon Carl Rauch vaivan fat part a Haldenstein. Da manzunar ais il fat, cha'ls resultats da l'inglümaziun da vias cun glüms LED sajan buns e cha latras pon gnir spargnà bler'energia.

**Radunanza cumünala dals 17 october**

Il vicecapo, Andri Poo, vaiva redigi las folias pella preschantaziun da la tractanda «Fusiun dals cumüns». Il Cussagl valüta la lavur sco fich buna.

L'actuar:  
Marco Fallet

Il Capo:  
Albert Mayer